

Headlines

- प्रधानमंत्री नरेन्द्र मोदी होर अज्ज दिनै 11 बजे आकाशवाणी पर अपने मन की बात कार्यक्रम दे राहें देश-विदेश दे लोकें कन्नै विचार सांझे करडन।
- गृह मंत्री अमित शाह होरें रजौरी जिले दे बड़हाल ग्रां च रहस्यमयी मौतें दी जांच लेई अंतर-मंत्रालयी टीम खडेरने दा हुक्म दित्ता ऐ। लेफ्टिनेंट गवर्नर मनोज सिन्हा होरें इस विशेष टीम गी इत्थे भेजने लेई गृह मंत्री हुंदा आभार जताया ऐ।
- उपमुख्यमंत्री सुरिंदर चौधरी होरें बड़हाल दा दौरा लाइयै सोगी परोआरें कन्नै मलाटी कीती ते उनें'गी हर मुमकन डाक्टरी मदाद दा भरोसा दोआया।
- जम्मू-कश्मीर पुलसै किश्तवाड़ च सरगर्म 4 आतंकवादिएं दे पोस्टर जारी कीते न जिंदे पर 5-5 लक्ख रपें दा ईनाम रक्खेआ गोदा ऐ।
- महाकुंभ मेले 2025 लेई जम्मू थमां प्रयागराज लेई विशेष बस सेवा शुरु।

<><><><><><>

PM Mann Ki Baat

प्रधानमंत्री नरेन्द्र मोदी होर अपने माहवार रेडियो कार्यक्रम 'मन की बात' दे राएं अज्ज अपने विचार, देश-विदेश च रौहने आहले श्रोताएं कन्नै सांझे करडन। उ'आं ते एह प्रोग्राम महीने दे अखीरले ऐतवारें दिनै 11 बजे प्रसारित होंदा ऐ पर ऐकती खीरी ऐतवार 26 जनवरी होने करी, एहदा प्रसारण इक हफ्ता पैहले कीता जा'रदा ऐ। एह इस कार्यक्रम दी 118मीं किश्त होग। एहदा प्रसारण आकाशवाणी ते दूरदर्शन दे समूलचे नेटवर्क उप्पर कीता जाहग। एहदे अलावा प्रधानमंत्री हुंदे दफ्तर, सूचना ते प्रसारण मंत्रालय ते आकाशवाणी ते दूरदर्शन दे यूट्यूब चैनलें पर बी एहदा लाईव प्रसारण होग। आकाशवाणी पर दिनै 11 बजे एहदे हिंदी प्रसारण दे तुरत मगरा इलाकाई भाषाएं च एहदा अनुवाद बी प्रसारित कीता जाहग। आकाशवाणी जम्मू दे प्रादेशिक समाचार एकांश आस्सेआ अज्ज रातीं साढ़े 10 मन की बात पर आधारित इक विशेष कार्यक्रम दा प्रसारण बी कीता जाग जेहदे च साढ़े स्टूडियो च मतूद होंगन जम्मू यूनिवर्सिटी थमां प्रो. गरीमा गुप्ता।

<><><><><><>

Amit Shah Rajouri

केन्द्रीय गृहमंत्री अमित शाह होरें राजौरी जिले दे बडहाल ग्रां च होई दिएं रहस्युयी मौतें दी जांच लेई इक अंतर मंत्रालय टीम दा गठन करने दी घोषणा कीती ऐ। गोरतलब ऐ जे बडहाल ग्रां च हुनै तगर 16 लोकें दी कुसै रहस्यमयी बमारी दे कारण मौत होई गेदी ऐ। अंतर-मंत्रालय टीम जेह्दी अगुवाई गृह मंत्रालय करा करदा ऐ। अज्ज बडहाल दा दौरा करग। इस टीम च सेहत, राई-बाई, रसायने ते हैल ते पानी सरबंधे साधने-स्रोतें दे मंत्रालये दे विशाषज्ञ रखे गेदे न। टीम दे सदस्य, स्थानीय प्रशासन कन्नै मिलियै प्रभावत परोआरें गी फौरी राहत पजांगन ते भविक्ख च इयै नेह हादसैं कोला बचने आस्तै एह्तियादी उपाह लागू करगंन। तोआई उपराज्यपाल मनोज सिन्हा होरें गृहमंत्री शाह हुंदा विशेष जांच टीम दे गठन लेई ते उसी राजौरी दे बडहाल ग्रां भेजने लेई णन्नबाद कीता ऐ।

<><><><><><>

Dy. CM Badhaal

उपमुख्यमंत्री सुरिन्द्र चौधरी होर कल राजौरी जिले दे बडहाल ग्रां दा दौरा कीता। अपने दौरे दरान उपमुख्यमंत्री होरें बडहाल ग्रां च होई दिएं रहस्यमयी मोतें कन्नै पीड़ित परोआरें कन्नै मलाटी कीती ते उनेंगी जकीन दोआया जे मामले दी निग्रयक जांच कीती जाग। सुरिन्द्र चौधरी होरें पीड़ित परोआरें गी पूरी मदाद देने दा बी भरोसा दोआया ते आखेआ जे प्रशासन पाससेआ राहत पजाने दे सारे जतन कीते जा करदे न। उपमुख्यमंत्री होरें आखेआ जे डाक्टरी मदाद ते जरूरी आपूर्ति गी बी जकीनी बनाया गेआ ऐ।

तोआई जम्मू कश्मीर पुलस दी विशेष जांच टीम नै इस मामले च मशकूक लोकें गी पुच्छ-गिच्छ लेई हिरासतै च लैता ऐ।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेह्दी उमर 24 थमां 50 ब'रें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी

जम्मू पिन कोड 180001 उपपर 15 फरवरी 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Posters Released

जम्मू कश्मीर पुलस नै किश्तवाड़ जिले च 4 सक्रिय उग्रवादिएं दी तस्वीरां जारी कीतियां न ते इनें चारें उग्रवादिएं दी पुख्ता जानकारी देने लेई 5-5 लक्ख रपे दा इनाम देने दी घोषणा कीती ऐ। इनें उग्रवादिएं दी पंछान सैफुल्लाह, फरमान, आदिल ते बाशा दे तौरा पर कीती गोई ऐ। इनें चौनें उग्रवादिएं दी तस्वीरां उर्दू ते अंग्रेजी च छापे गेदे पोस्टरें राएं जारी कीतियां गोइयां न।

<><><><><><>

Bus Satnd Mahakumbh

जम्मू कश्मीर रोड ट्रांसपोर्ट कारपोरेशन नै महाकुंभ मेला 2025 लेई जम्मू ते प्रयागराज बश्कार इक विशेष बस सेवा शुरू कीती ऐ। राजाना चलने आली विशेष बस सेवा कल थमां शुरू करी दित्ती गोई ऐ। ट्रांसपोर्ट मंत्री सतीश शर्मा होरें इस विशेष बस सेवा गी हरी झंडी दस्सियै जम्मू बस स्टैंड थमां रवाना कीता। एह विशेष बस रोजाना जम्मू थमां रवाना होआ करोग। यात्री अपनी टिकटें दी बुकिंग ऑनलाइन पेमेंट दे राएं करी सकदे न।

<><><><><><>

Tribal Minister

जनजातीय मामलें दे मंत्री जावेद अहमद राणा होरें खित्ते च जनजातीय समुदायें लेई कीती जा करदी कल्याणकारी पैहलकदमिएं दा जायजा लैने आस्तै कल इक बैठक लाई। इस मौके पर उनें सरबंघत अधिकारिएं गी निर्देश दित्ते जे ओह धरती आभा योजना दे तैह्त मंजूरिएं आहली प्रक्रिया च तेजी आहनन, कम्में च बेवजह होने आहले चिर गी दूर करोआन ते शिक्षा, सेहत दिक्खभाल ते रोजी-रूट्टी कमाने मतल्लक खेत्तरें च जनजातीय विकास गी तरजीह देन। मंत्री होरें कलस्टर जनजातीय आदर्श ग्राएं ते दुदधै दे उत्पादन आहले ग्राएं सरबंधी परियोजनाएं गी बेल्ले सिर सबूरा करोआए जाने दा जोर पाया ते बकाया पेदे वजीफे दी स्थिति ते गैर-सरकारी संगठनें सरबंधी ग्रांटें दा बी जायजा लैता। मंत्री होरें निर्देश जारी कीते जे ओकड़ी परियोजनाएं गी पैहल दी बिनाह उपपर तोढ़ चाढ़ेया जाना चाईदा जेहड़ियां सरकार दे जनजातीय कल्याण आहले लक्ष्यें मूजब होन ते ऐसी परियोजनाएं दे कम्में च पूरी पारदर्शिता ते दक्षता बी जकीनी बनाई जानी लोड़चदी ऐ तांजे जनजातीय समुदायें गी इंदे थमां बद्धोबद्ध लाह हासल होई सकै।

<><><><><><>

CS-AIIMS Visit

मुख्य सचिव अटल डुल्लु होरें खित्ते दे ओकडे दूर—दरेडे ते फ्हाड़ी इलाकें च इलाज—मुआलजे सरबंधी ढांचागत सुविधाएं च सुधार दी जरूरतै पर जोर पाया ऐ जित्थे हाल दी घड़ी सेहत दिक्खभाल आहली सुविधाएं तगर पुज्ज बड़ी सीमित ऐ। मुख्य सचिव होरें एह गल्ल कल एम्स जम्मू दे अपने दौरे दरान आखी। इस मौके उपपर उनें सरबंधत अमले कन्नै गल्लबात करियै मरीजें गी दित्ती जा करदी सुविधाएं बारै जानकारी बी हासल कीती। मुख्य सचिव होरें मय्यारी सेहत स्थूलतां दस्तयाब करोआने च एम्स जम्मू दे जतनें दी सराहना कीती। उनें इस गल्लै पर जोर पाया जे एम्स जम्मू गी प्रदेश दी सरकार, आईआईटी संस्थानें ते आईआईएम संस्थानें कन्नै रलियै कम्म करना लोड़चदा ऐ तांजे खित्ते दे दूर—दरेडे इलाकें च सेहत दिक्खभाल सरबंधी चुनौतिएं दा असरदार ढंग्गै'नै सामना कीता जाई सकै। जम्मू दे डिवीजनल कमिशनर रमेश कुमार होर बी इस मौके पर मुख्य सचिव हुंदे कन्नै उत्थे मजूद हे।

<><><><><><>